

# Kibrahacha a celebra 30 aña y cla pa ricibi e generacion nobo di grandinan



ORANJESTAD (AAN): Club Kibrahacha ta den pleno celebracion di nan 30 aña di existencia. E directiva no tin pensa pa para keto y kier amplia nan actividadnan.

Den entrevista cu Edward Erasmus, tesorero di e directiva di Kibrahacha cu ta dirigi riba ciudadanonan di 60+, el a bisa cu un celebracion asina ta e bon momento pa refleha riba loka nan ta haciendo,

ratifica e servicio cu nan ta brinda y kico kier logra extra pa den futuro.

Meta cardinal di Kibrahacha ta organiza evento, diverticion, pa e grandinan di Aruba cu ta miembro di e organizacion. "Nos ta consciente cu e poblacion ta enveheciendo den forma acelera y nos tin cu ta prepara pa esaki. Kibrahacha tin un tarea hopi importante pa mantene nos

grandi activo, tanto mentalmente como fisicamente, den comunidad. Nos ta spera cu lo tin hopi mas cliente cu lo bay atende eventonan di Kibrahacha," Erasmus a duna di conoce.

Mirando cu den futuro e organizacion sigur lo bay ta hayando mas miembro, nan a cuminsa pa inverti den nan edificio, situa na Piedra Plat, cu ta worde yama Centro Kibrahacha.

Pero mas importante ta cu Kibrahacha ta consciente cu tin un generacion nobo di grandinan, cu tin otro interesnan. Un di e eventonan cu nan ta interesa den dje ta movecion, dance-fit, pues programanan cu ta pone nan move. Recientemente Kibrahacha a cuminsa cu un lokaal di computer unda cu e grandinan ta mas conecta cu e mundo aki.



"Nos ta prepara pa e generacion nobo aki cu tin smart-phone y nos tin Wi-Fi na nos centro."

Loke tambe el a menciona ta cu Kibrahacha ta depende hopi di e voluntario y donacionnan cu nan ta ricibi for di diferente skina. Pero nan ta cla pa e reto cu e generacion nobo ta trece cune.

Kibrahacha ta un organizacion cu tin e meta sirbi interes di personanan di 60 aña bay ariba. El a worde lanta na un momento cu no tabatin ningun actividad pa e grupo aki di e comunidad. Y for di momento cu el a nace, e organizacion a sirbi e 60 plussers debidamente.

Un di e colaboradornan, coordinadora di evento di Kibrahacha, ta Diana Uchtmanh de

Nobrega. E tin 15 aña di su bida dedica na traha den forma voluntario cu Kibrahacha. El a recorda cu na momento di celebra 25 aña existencia a haci algun cambio pa modernisa e organizacion, manera a bin cu un logo nobo pa atrae mas miembro, a amplia nan actividad y un di nan ta mas movecion. Pero tambe tin Wi-Fi cu ta worde ofreci gratuitamente na su miembronan.

Diaranson a celebra nan 30 aña di existencia cu miembronan y a tene un evento di baile unda cu por a sinti un ambiente hopi agradabel.

Señora De Nobrega a splica cu nan a crece basta ultimo aña, pero awor mester percura pa tin suficiente espacio y hermentnan pa atende cu e miembronan cu nan tin.